

順德縣志卷之三十目錄

列傳十 方外

簡雲顛

葛道人

遊隱堂

羅寶珍

陳心隱

吳章

梁可瀾

何子延

何練菴

梁珍受

陳琴知

尹道人 以上道家

德欽

古通

古行

古鍵

今巖

今印 海岸

元亮

性顯

913-733
2124
16

寒山

道邱

元覺

開調

知通

慈湛

自渡

成鑑

源子

幻鑒

以上釋家

附

陳道

陳準

何穆

傅容

以上宦官

順德縣志卷之三十

列傳十 方外

按縣僅百里有二氏無仙佛然紫霄圃仙跡傳自趙宋鼎湖開山又縣人也爰彙傳之

道士簡雲顛者居平步村狀若風狂善號風雷驅役百鬼與人遊蒲澗病日色太炎謂曰無苦吾令雷師張傘相護卽瞑目爲呼使狀須臾陰雲凝坐上四外日色如故鄉人以旱請禱雨則爲壇箕踞其上書符篆焚之有頃雷電滂沱交作會城北二里有女病魅簡視之曰老龜作祟耳因曰昨遇一番蠻侮我當使蠻人捉之卽叱呼四指須臾一番人擁陰鸇踰垣而入手持一巨龜出大三尺鏗然墮地昏仆久之始能視其語侏僂不可曉簡大笑斥之去而龜已死其魅遂絕

陳志

葛道人自云葛姓遊憩葛岸五岳神廟時鄉人病疫道人以葛屑和藥調之輒愈求者日衆題柱詩曰羅浮山下杖枯藜琪樹瓊林屬品題兩腋天風何處去錦巖西更碧雲西遂去莫知所之錦巖碧雲皆西樵山峰也

張府志
五山志林

游隱堂宋進士游俊卿第三子常修煉於鳳凰山南元真觀中所居紫霄圃煉丹井藏真菴皆其遺跡後遊新會梅角湖遂遺丹云

陳志

羅寶珍號務光子大良人生有異質恬淡脫畧世網善詩精彈琴尤精理數之學既長娶妻生子忽出遊武夷異人授以導引之術歸而棄家修煉於元真觀之紫霄圃作詩有吾今識破生死語後失所在計其年已百五十又六矣自斲一琴

名震北雷宋末遊閩居一寺謂寺僧曰遺此琴他日還我孫
僧以爲戲言留爲空門寶越二百年二十代孫黼以明宏治
間歷守興化泉州其子偶過廢寺見琴問之僧述其故遂取
以歸

五山志林

按陳志不言留琴事採訪冊云裔孫宦閩入廢寺見古銅
器漫漶守者謂仙人務光子遺屬子孫自廣來可與之今
羅氏仙閣尙陳其器與志林異天尺作志林時豈不知祖
閣陳器耶

陳心隱熹涌人陳氏之七世祖也元至元間人少有道骨厭
俗煩囂與其友讀書於會城北白雲山遇瘋者投以素書旦
夕習之遂傳其道能役鬼神精勅勒術稍爲人知遽隱去不
知其終嘗樹榕於其始祖祠後騎墻下根數百年垂蔭數畝

而墻不改先是子姓奉祀於祠遠近以水旱疾疫禱者不絕門幾虛設乃別建一祠於祖祠之左與其弟耕隱並祀曰棣萼古廟香火視彼處神廟求者輒應至今稱之曰陳大法師

採訪冊

吳章萬歷時人業儒好神仙曉音律爲里老輸糧寓逆旅園荔初熟主人啖之餘數枚納衣袂乘月而歸隱聞簫管聲仰見祥雲擁彩輿從者或駕青牛白鹿各執仙樂凡數十吳奔追諦聽足不覺離地將曉從者顧吳曰子來已遠將無迷歸路乎吳因詢輿中者誰曰我泰山主碧霞元君巡遊南極炎海天妃設冰果會留讌三日今回宮耳轉瞬雲四散吳墜地乃山東布政司署闍人以爲盜執送藩伯具述之方叱其妄搜袂中鮮荔故在始信檄還粵東後厭烹飪舉體輕逸年九

十八

鈕琇
觚賸

梁可澗字元叔桂林人耽山水隱居羅浮慕葛稚川自號三十二峰太狂長嘯仙邑令連繼芳高其人訪諸山中酬和竟日著有狂仙詩草年八十卒顏色如生入棺輕如無人葬白鬱峰子夢陽工詩畫及大小篆諸生

姚志

何子延字印衷羊額人諸生性嗜酒喜遊遊必攜酒醉必吟詩多技藝有巧思時值滄桑遂往嵩岳入少林寺託事遣家人下山比返則蓋棺矣遺書命歸葬後十年有人見於廣西橫州山中又二十餘年於衡山復遇之

何氏
族譜

何練菴羊額人好古文詞多與異人往還常於宅旁結練爲菴因以自號一日語僕曰珠母召我遂捲其菴不知所之遺詩於石有月巖沉影到三池句後僕於珠母池見練菴垂正

練入海中卽之不見歸告其子瑞鯤往候過羅陽寺見父遺像泣詰寺僧曰前年有客乘練如雲降於月巖吟咏竟夕人驚其仙傳爲勝遇遂繪其像祀之鯤跪乞遺像而還

五山志林

吳道人縣人好談名理遊南海山臺寺愛其勝留棲焉遂斷葷不娶持戒卽花卉不忍傷居三十餘年正統中忽謂居人關振與曰余將歸矣當從火裏去爲我窖置烈火焉如其言道人捉筴一拂端坐火中俄有蚨蝶大徑尺從火裏騰空而去臨化語觀者曰不十年兵戈四起汝曹識之後黃蕭養作亂僭號改元民多塗炭其言果驗

郝通志

梁珍受字伯賢四歲失怙母馮撫之長通經傳勇於爲義鄉西有豪猾戴希由者聚黨肆兇暴商其地者稅之過其居者必令釋履人號紅棍軍人洪武間有詔天下兇惡害民者許

執赴西都按問珍受設法獲希由解都伏法歸入廬山久之
得活人術歸治病立起會疫行多賴全活又修橋利行人置
田贍族士嘗夜與所交渡河觀劇折葦爲舟令閉目瞬息卽
渡藩司嘗及其從祖仁隱門亢旱禱不效延珍受祈卽得雨
從父宗玉嘗爲贅婿於黃連珍受夜念諸弟頃刻輒至相傳
沒時香滿室云子民安孫所皆自有傳

梁氏譜
採訪冊

按世傳珍受豢一巨蛇風雨夜輒出沒錦鯉海蛇蜒數丈
恐爲人害送之新會圭峰山潭或以爲禿尾龍時挾風雹
出者是也

陳琴知熹涌人翰六子世傳儒業少聰穎好奇性誕傲習吐
納術所之輒窮年三十餘妻死未有子不復娶入羅浮山留
居不還道流時或遇之及同縣黎簡遊羅浮聞琴知尙在黃

龍觀亟訪之不得自序其詩有琴知枯隱茲觀日月遂往煙蘿旣深姓名已更形貌亦闕空山茫茫滋我嘆息語其爲時賢所稱述如此先是琴知有堂妹曰密者亦好道術幼善事之琴知居外室去舍數十弓每飯必其妹挈籃餉焉隱羅浮後一夕偶歸坐舊所居室外亦惟其妹見之家人未之知也又飯之飯畢其籃予之曰中有書件物事以歸汝長宜善自用遂去檢籃則鏡大小凡二具棗木劍一其妹習之亦能驅役鬼物至今鄉里能道其事

五百四峯堂集
採訪冊

尹道人字南芳龍江人少以範金爲業某總戎者最喜其技招入署相從至都門遇異人授以辟穀術自是不寢不食日惟飲水啖柏葉少許時爲人誦道經禳疾夜坐一胡牀徑無倦容羅天尺讀書粵秀山每相遇投三元宮與講服食甚洽

其後稍食煙火顏轉豐紅不知其終

右道家

僧德欽江右人宋咸淳間行腳至寶林寺持戒甚嚴與譚用善一日早起焚香沐浴更衣坐化先一夕用善夢德欽求木菴侵晨詣之已寂累月不腐其徒與用善漆傅其肉身至今奉六祖殿中僧元亮世其香火

陳志

按五山志林云元時行腳至寶林蓋一時誤記

古通字循圓縣梁氏子原名國楨字友夏郡諸生性謙謹與初學言輒自稱名以亂隱居於鄉閉門却掃與妻子修淨土之行入雷峰薙髮乙巳受具初典書疏未幾出充雷峰下院至天然念其老令還本山訓課功專心勤雖毫不倦坐蛻山中道俗悲之

海雲禪集

古行字克躬縣人生爲循圓族弟童子時與足兩同鄉塾世亂棄去慨然思出世養親至歿卽入雷峰受具行募於吳楚閩越中積有勤勞丙辰嶺外阻梗天然念棲賢困阨音問濶絕間關無可使者行毅然請往至淨成順化

古鍵字鐵關縣胡氏子有祖名受僧者至鍵果出家而祀絕甫十八卽出世雷峰辛亥始登具初欲入棲賢依天老人至海幢爲阿大師留掌記室尋典賓客丁丑復居雷峰掩關有比丘香雲刺指血求書華嚴經鍵暑月披衣長跪繕寫精勤過勞得咯血病遽示寂尙餘數卷未獲卒業

今嚴字足兩縣羅氏子原名殿式字君爽邑諸生與兄寅皆有文名爲梁朝鍾梁祐達小友弱冠從天然禪師求生死大事已丑脫白受具其母頗知書相繼落髮嚴性孤高好潔非

其人雖貴游不肯晉接居雷峰丈室最久戊戌詣嘉興請藏
還至歸宗閱大藏一周歲飢日僅食匙糜以病還雷峰愛棲
賢山水扶病强行竟蛻于五乳峰靜室嚴道念甚深知解明
敏有西窗遺稿一卷秋懷百合諸詩尤爲世所傳誦

俱同上

今印原名瓊字佩之更字海發逢簡梁氏子家貧嗜學少與
吳煒梁佩蘭友善通試東莞及本籍並居首補庠生先是戲
爲人構一藝錄之輒冠其曹遂自悔欺冒乃自試旣售屢蹟
場屋館西粵歸而母死哀慟吐血垂絕而甦自是銳意修道
步入匡廬皈天老人落髮受具研究至於忘身隨師還粵復
返廬山掌書記確有證入行脚至黃州天章付以大法由陝
西入都某叢林迎請住持時徒眾甚盛當事慮惑眾問能移
堂前樹乎海發卽三叩其樹曰根深不可移也一日趺坐集

眾語曰西方淨域近卽靈臺物欲不滓洞見天心語畢遂寂
有羣鶴繞寺弟海岸亦海幢名僧

六瑩堂集
海雲禪集

按相傳海發出家在戊子其年元旦同鄉黎象斗夢錦鯉
海有紫氣接空語其子海達曰海發文佳甚今科必得魁
首後始知爲修行之應

元亮者字浩則番禺黃氏子少爲傭目不知書及爲僧頓開
智慧曉詩善擘窩大字開法寶林寺居士咸敬禮之忽一日
遍延僧俗與訣曰吾當涅槃矣其明年正月十五日平副寺
以龕未就請更其期則改二月二日屬速工期至徒又以龕
漆未乾請再延元亮躊躇半晌曰二十四日決行矣屆期諸
山畢集卓午擊鼓說偈曰世界看空似過雲水邊林下絕囂
紛浮屠擁護心猶壯此外餘情不欲聞坐而圓寂龕以藏之

世臘五十三梁靈長少所親見

五山志林

性顯者縣人缺其俗里出家居錦巖山東菴與陳邦彥居近交厚爲作乞米帖屬明季邦彥兵起性顯自領一隊從邦彥北行守清遠城爲李成棟攻陷性顯巷戰手殺十數人後援不繼爲亂兵所砍死焉

陳巖野文集

寒山者不知何許人居錦巖山西菴作錦巖靜悟詩六十四

首

見錦巖志畧

語或儒或釋精深奧衍與東菴僧性顯動止各殊

阮通志

巖野文集

錦巖志畧

道邱字離際稱棲壑和尚龍山柯氏子母陳夢老僧借宿而娠生時室有異光少卽願出家薙染受具侍憨山於寶林通內外典籍旣悟文字中非彼法究竟遂辭憨山度嶺至金陵事浪雪一雨深究宗趣合爲嗣講復如杭叅蓮池授以淨土

法門并附衣鉢入江右侍博山無異和尚無異寂後又八匡
廬同叅宗保於金輪歸廣州聞者爭謁陳文忠梁未央延住
白雲蒲澗學者輻輳共坐枯木床種田博飯一日謁六祖於
新州道中望鼎湖山水秀麗策杖而入知爲福地遂開山焉
先是憨山嘗入山得其地懸記曰不久有至人開山於此記
以詩旣而地主梁少川與清波延僧構菴其中共結淨社招
陽江朱子入主之聞道邱至奉爲住持遂成大刹內有涅槃
臺慶雲禪院寮舍僧房工值巨萬談笑成之至是憨山言果
驗延請者衆皆却之裹足不出徒衆來依者數百無擔石之
儲不置淨業所給悉出募化方伯胡公嘗密與監寺雲儔募
金千兩有奇擬置田齋金入山却不受謂釋子修行龍天擁
護四字自足何用田爲自開山以來用度未嘗困乏殿前波